

欽定剿平粵匪方略

欽定剿平粵匪方略卷六十九 癸丑年

十一月十五日

丙辰

楊以增奏言

臣接辦徐州

堵連日將肅清淮北運道各事部署後已定期前往適接揚州探報知金陵大股賊船援撲鎮揚已將儀徵占踞查該逆占踞儀徵固爲接應瓜揚但西擾六合北窺天長均有間道可達清江臣若遠離恐清江民心惶惑且署提臣和春

聞

已於初七日過浦赴徐權其緩急臣自應仍駐

清江就現有兵勇鎮靜嚴防以期安定奏入報

同日山東道監察御史錢慶善奏言臣聞近日

勝保一軍攻擊逆匪木城天津義勇先入官兵

未能接踵前進以致勇入受傷漸生怨懟當此

攻勦喫緊之際兵勇相睽利鈍攸關請

飭令勝保拊循義勇俾生感奮並將帶隊不前之武弁
查明正法以肅紀律又聞逆匪待援不至糧食
日短坐以待斃彼必不甘鋌而走險防更宜密
更聞此股逆首一籍隸湖廣一籍隸山東因刻
下口糧不繼或思東竄或思北來詭計未定各
懷已見自宜乘其心意不堅設法勦擊奏入

上命軍機大臣傳諭勝保曰御史錢慶善奏近日攻擊

逆匪木城天津義勇先入官兵未能接踵前進以致
勇入受傷漸生怨懟等語天津義勇素稱驍悍著該
大臣實力拊循務使兵勇一心互相策應至所稱此
股逆首一思東竄一思北來詭計未定乘此勦擊必
不相顧著卽妥速設法迅籌攻勦但有可乘之機不
可坐失

十八日 己未 舒興阿奏言 臣欽奉

諭旨著臣毋庸赴楚卽日帶兵迅往安徽會合進剿自
應趕緊籌辦惟近來官兵經過地方供備車馬
維艱現在軍務喫緊臣擬將鍋帳軍裝量爲酌
減期於兵行迅速一俟車馬齊備卽日督率官
兵馳往安徽一帶與江忠源會合進剿以期肅
清江北

同日袁甲三奏言竊維自古禦敵之道不外防

勦然必能勦而後能防所謂能戰而後能守也
粵賊竄擾數省

皇上籌兵籌餉無一處不防究無一處能防者何哉地
散則難守兵分則難支軍興數載未聞聚各處
防兵與粵賊決一死戰而一隅有警四隅籌防
左支右絀賊之所至徒供一潰卽日取失守者
而議之亦屬於事無濟此專言防而不言勦者

之貽誤事機也卽如安徽一省除江南徐揚金
陵本屬接壤此外楚豫蘇浙江西連界之區不
一而足紛歧錯出門戶甚多而建省安慶則以
大江分南北今建省廬州又當以廬州分南北
賊踞安慶長江之險皆爲賊有安慶直如粵逆
傳舍廬郡以南不勝防矣此外陸路則浦口爲
第一門戶梁山爲第二門戶其三最要則臨淮

其四則固鎮水路則由裕溪東關直達廬郡不
過百數十里由盱眙至臨淮亦不過二百餘里
下則和州之烏江上則桐城之縱陽由舟登陸
直通驛傳若專事言防一處之險駐兵數百募
勇又數百卽安徽一省已足竭天下之財而無
益於事此已覆之轍不待臣明言者也現在賊
偏桐舒駸駸北竄而各處險要半屬空虛臣以

爲廬郡以南亟宜勦廬郡以北則宜防防勦並
施非多兵不可安省兵力單弱每因別無可調
募勇以濟兵之不足而自正月安慶告陷以來
所招之勇無不見賊立潰鳳陽之勇城陷而隨
賊肆掠舒城之勇戰潰而導賊入城此鄉勇萬
不可恃臣所目擊耳聞者也現在新撫臣江忠
源因兵力太單不得不各處募勇江忠源調度

有方且所帶楚勇甚屬得力必能妥爲控馭然
此處人情非如楚勇之嫻訓練而能聯臂指效
忠義而可作腹心臣愚不能無慮竊計勇旣無
用兵亦難籌此時武昌解圍楚豫交界可以無
警查陝甘督臣舒興阿所帶陝甘兵三千名尙
在陳州可以移緩就急來皖應援由陳州府四
十里至沙河登舟由沙河入皖直抵六安順流

而下一帆可至必得此兵與撫臣會合一處大壯聲勢庶可以決成功應請

旨飭令舒興阿星速帶兵前來庶江忠源得以併力南攻不致以烏合之勇再誤機宜卽謂逆情詭譎難保不復回武昌楚豫之交未能十分放心然皖省距楚豫皆近亦可就近策應儘舒興阿不能親來亦請

飭令派兵二千名前赴皖省交撫臣江忠源調遣兵力
既厚南路之賊即可痛加剿擊先取舒桐次復
安慶殲除淨盡固爲深幸卽有餘匪偪入長江
下流或扼東西梁山要隘攔截或與江揚共議
翦除大江東南庶幾有豸不亟圖此而事事設
防則失安慶而守桐失桐城而守舒失舒之後
六廬交警西北兩路爲之騷然其患詎可勝言

况賊已壓境再行四路催援無論在事文武各
有專責勢難去而之他卽聞信卽來而夫馬耽
延亦屬緩不濟急且自桐城旣失南北文報梗
塞不通江南安甯徽池太廣五府一州聲息不
聞前據探報賊由蕪湖進宣城之灣沚而窺徽
甯由太平廣德徧東壩而撲蘇常若果如此蘇
浙危矣此南路之急宜勦而不宜防者也北路

水陸要隘各有重兵駐防而由廬州至宿徐祇
固鎮有防兵七百臨淮並無一兵臣統籌大局
守固鎮不如守臨淮固鎮僅堵陸路專護宿徐
臨淮則水陸並防兼爲皖豫屏障此前侍郎臣
周天爵舍臨守固之未爲得計也然查臨淮以
一河爲阻自應防堵北岸而北岸廬舍蕭條地
形寥廓又非防兵厚集不足聯絡抵禦河臣楊

以增旣駐徐州勢可兼顧應請

旨飭下楊以增俟和春蘇布通阿無論何人來徐卽飭
令酌帶兵勇並防守固鎮之兵概赴臨淮則北
可捍衛宿徐阻賊長驅之路西可保障懷蒙遏
其竄豫之衝此廬郡以北至要之地與其分而
守不若合而防也至安慶克復後各路合兵以
防爲勦以勦爲防撫臣江忠源自能相機籌策

非臣一時所能豫計也均奏入

上命軍機大臣傳諭舒興阿曰連日疊降諭旨令舒興
阿馳赴安徽會剿該督已早經奉到皖省情形緊急
自應迅速赴援何以該督屢次奏報仍在陳州並藉
口於地方供備車馬維艱必欲俟一切齊備方能前
進此種惡習實堪痛恨河南歸陳一帶喫重已有徐
廣縉在彼防守並命牛鑑於交卸臬篆後卽行馳往

且在潁亳後路該督果卽統帶大兵赴皖何患該逆之闖入豫境若任意遷延不顧大局於心何安本日又據袁甲三奏請飭令舒興阿領兵赴皖援應並稱陳州四十里至沙河登舟由沙河入皖直抵六安順流而下一帆可達是程途不遠絕無迂折繞越之難著舒興阿迅卽前赴廬州該省勦辦事宜卽責成舒興阿會同江忠源速籌攻克毋稍延誤

上又命軍機大臣傳諭袁甲三曰所陳皖省南北兩路情形均能按切時勢自應如此辦理逆賊占踞江面游行無忌近復竄踞桐舒北路最形緊急江忠源病當漸愈諒可卽日帶兵迎勦舒興阿自陳州赴皖該督所帶官兵並郝光甲管帶之兵已有四千餘名果能剋日前進與江忠源併力合勦當可得力昨復諭令曾國藩自湖南統帶礮船沿江下擊以備水陸夾

攻但不知何時可以趕到至臨淮固鎮一路單弱情
形甚爲可慮楊以增未能卽赴徐州和春已於初七
日過清江浦但未曾詳敘帶兵若干諒因金陵大營
無兵可分之故今欲嚴扼臨淮固鎮不能不就現有
兵勇擇要布置該給事中旣經見及必須專防臨淮
卽與該提督妥籌商辦前命袁甲三兼顧宿徐現據
奏報已抵蒙城自可就近布置該給事中勦辦捻匪

甚爲妥速頗有聲威諒必能悉心籌畫保障全淮也

十九日

庚申

江忠源奏言臣於初四五日病勢漸

輕適署撫臣劉裕鈐委員齎送安徽巡撫關防

蕪湖關關防到六安臣卽於初八日祇領任事

連日探報賊在舒城補修城垣開挖濠溝閉門

堅守臣當留總兵音德布帶領兵勇一千餘名

防守六安臣於初九日力疾帶領兵勇二千七

百餘名自六安兼程前進初十日馳抵廬郡擬
先將廬郡守禦事宜略爲布置卽知會音德布
約定時日從六安前進臣帶領兵勇從廬州前
進兩路夾攻仰託

聖主威福舒城當不難克復惟是安省現在萬難措手
情形有不能不據實直陳於

君父之前者江南岸上自東流下至蕪湖瀕江數百里

賊船隨處可泊卽隨處可以上岸現在江面梗
阻尙難兼顧就江北岸而論上自望江下迄和
州沿江六百餘里防不勝防其中最要之處莫
如東關而玉山與張印塘所帶兵勇僅二千二
百名現在廬郡所恃者僅臣帶來四川兵開化
勇廣勇七百餘名及在六安新募之勇二千名
與李鴻章勇六百名劉裕鈐新募之勇數千名

且初集之衆尙須設法教練方能得力此安省
兵勇單薄之實在情形也至於兵餉藩庫絲毫
無存東關兵勇已欠發口糧二十餘日臣所帶
來銀六萬兩除發給滇川開廣各兵勇十一月
分口糧及新募各勇半月口糧並置備各勇鍋
帳器械已用二萬餘兩外僅存三萬餘兩若將
東關兵勇及劉裕鈐等新募之勇口糧全行補

給所存已屬無幾而城上守禦器械一切俱無
城中米糧又復不足予藥鉛丸俱形短少若欲
一一置辦直苦無從措手此安省兵餉匱乏之
實在情形也新任臬司旣無來皖信息現在尙
係已革臬司張印塘署理揀發知府四員僅到
陸希湜一員業已委署潁州府篆務廬郡候補
知縣僅有數員候補佐雜亦僅有十餘員臣初

到任既未知其能否而應辦之事百端交集直
是無員可委此安省乏員之實在情形也夫安
徽一省本當賊匪北出之衝現在桐城又復爲
賊所踞而無兵無餉無人至於如此臣抵廬一
日焦灼萬端然臣受

恩深重自當於萬難措手之時力求有濟俟廬郡布置
稍定卽當督率兵勇前往攻剿斷不使賊匪北

實一步以仰慰

宵旰憂勞

江忠源又奏言正緒摺聞十一日戌刻劉裕鈐等派往防守沙河之勇敗回十二日黎明賊匪大隊徑撲廬郡守城兵勇過單不敷分布臣力疾激勵將士誓以死守並分別咨調音德布自六安帶兵赴援玉山張印塘自東關帶兵赴援

袁甲三賊紆青自鳳嶺帶兵赴援並懇

恩就近飭派大臣統帶兵勇星馳赴廬並由部就近籌
撥餉銀以濟急需

同日江南提督和春奏言前奉

諭旨令臣馳赴徐州督辦防剿事宜卽於十一月初一
日起程十二日行抵徐州查該處南連皖省北
界山東城之西南兩面皆山東北緊靠黃河有

護城長隄一道高於城垣查看形勢駐兵防堵
必須守隄兼以守山方爲扼要徐州現存兵勇
四千餘名未經戰陣必須逐日教練庶遇敵可
期應手查徐州近接廬鳳爲南北咽喉防堵最
關緊要現聞安徽竄匪擾陷舒城賊勢尙在狡
獍必得迎頭截剿始可絕其北竄但安徽之臨
淮固鎮爲皖北之藩籬卽爲徐州之門戶此時

臨淮並無兵勇固鎮祇有參將劉玉豹帶領山東官兵七百名未免單薄臣奉

旨防守徐州不能不兼顧前路已飛咨向榮酌派得力官兵一千名星馳前來卽由臣統領前往堵剿以遏北竄

同日張亮基奏言臣於十一日馳抵德州一路詳視形勢凡與直隸接壤之處皆係平疇曠野

無險可扼實屬防不勝防惟相度邊要聯營截
擊尙屬以逸待勞操縱由已該州邊隘以柘園
鎮爲最要應以重兵扼守而在城兵勇僅千餘
名不敷分布查將軍瑞昌帶兵一千名現駐濮
州該處雖亦緊要而審度現在情形不能不移
緩就急先顧北路臣已飛咨該將軍帶兵來德
與臬司厲恩官各於柘園鎮附近擇要分營駐

紮聯成犄角之勢臣到任數日旋即出省省署
稽壓各件並刑錢捐輸各要務未及籌辦現在
武德兩路既有藩臬兩司及將軍瑞昌扼要分
駐足資守禦臣擬暫行到省料理應辦要務仍
隨時確探南北各路事機何處緊要卽親往何
處督防庶免顧此失彼之虞均奏入

上命軍機大臣傳諭江忠源曰該撫病已漸痊朕心稍

慰惟廬郡情形緊急殊深焦灼已嚴催舒興阿督兵
馳救和春已抵徐州亦令卽赴廬州會剿並命吳文
鎔等速飭戴文蘭統帶兵勇前來復諭令張芾撥銀
十萬兩河南山東無論何項銀兩迅速籌解安徽以
應急需矣袁甲三扼守北路剿除捻匪其能否赴援
尙未可必前命曾國藩趕辦船隻礮位並將所募楚
勇六千名由該侍郎統帶直赴安營與江忠源會合

水陸夾擊但恐到皖尙需時日該撫務須督率在城文武竭力固守俟援兵一到即可內外夾攻保全廬郡卽以固北路藩籬

上又命軍機大臣傳諭和春曰前因怡良奏鎮江軍務須一手辦理降旨令和春折回惟現在皖省緊急宿徐甚關緊要和春業已到徐著毋庸折回鎮江本日據江忠源馳奏逆匪直撲廬郡萬分緊急著和春卽

日酌帶兵勇兼程馳赴廬州會同江忠源等合力攻
勦毋稍延誤至所稱擬咨向榮酌派得力官兵一千
名星馳來徐以備攻勦著卽飛速咨調惟廬城勢甚
危急若待江南兵到再行赴援已屬無及現在舒興
阿統帶陝甘官兵四千餘名計日可抵廬郡該提督
卽可與舒興阿酌量調撥總以急援廬州遏賊北竄
爲要

上又命軍機大臣傳諭張亮基曰現在山東武定德州等處均關緊要該撫因有藩司崇恩臬司厲恩官並將軍瑞昌帶兵防堵遽請回省料理刑錢各務殊屬不知緩急該撫統轄全省責無旁貸何得安坐省城轉以防勦事宜委之他人況省城團練現有劉源穎等辦理更有何應辦要事重於軍務者耶目下靜海獨流逆匪尙未勦除淨盡南路一帶處處與東省界

連設有賊蹤關入咎將誰諉張亮基著卽出省馳赴
德州扼要防堵仍探明何路緊要卽向何路截擊總
當統籌兼顧不得株守省垣致誤事機現據江忠源
奏報賊由舒城圍撲廬州情形緊急餉需刻不容緩
著張亮基於山東省無論何款先行籌撥銀五六萬
兩卽日派員解赴皖省以濟要需

上又命軍機大臣傳諭吳文鎔崇綸曰逆匪攻撲廬州

郡城危急該撫所帶兵勇單弱已極江忠源前次飭
赴武昌之楚勇一千餘名湖南兵六百名雲南四川
兵未渡江者亦多留守武昌此項兵勇久隨江忠源
歷陣兵將相習湖北省城存兵尙不爲少而廬州危
急萬分稍有疏虞致賊北竄所關匪細著吳文鎔崇
綸迅飭原帶此項兵勇之都司戴文蘭並將弁人等
趕緊將江忠源原帶兵勇全數帶赴廬州聽候調遣

萬勿遲誤其黃州逆匪卽責成唐樹義實力追剿勿得株守省垣藉詞諉卸

上又命軍機大臣傳諭舒興阿曰據江忠源奏本月十二日賊匪徑撲廬州該處兵力甚單情形危急亟請就近飭派援兵前往著舒興阿帶兵星馳徑赴廬州與江忠源內外夾擊保護郡城該處爲賊匪北出之衝較之他處尤關緊要不待藉口於車馬未齊遲延

誤事現在提督和春已至徐州本日諭令馳赴廬郡
惟該提督帶兵無多著該督卽將所帶官兵分撥和
春統帶以資攻剿

上又命軍機大臣傳諭袁甲三曰賊撲廬州郡城危急
袁甲三駐紮蒙城距廬郡不遠現在該郡兵勇甚單
情形緊急著該給事中酌量如何帶兵前往協剿並
兼顧北路不令該匪乘虛上竄迅卽妥籌辦理

上又命軍機大臣傳諭張芾曰本日據江忠源奏廬郡情形危在呼吸需餉緊急著張芾迅將前撥銀十萬兩全數撥解以濟急需

上又命軍機大臣傳諭英桂曰本日據江忠源奏廬州情形緊急餉需刻不容緩著英桂於河南省無論何款先行籌撥銀五六萬兩卽日解赴皖省毋得貽誤
同日張芾奏言江省自上年七月辦理防堵以

來截至省城解圍後共用銀一百四十四萬餘
兩除截留本省地丁及雲南銅本等項銀一百
六萬餘兩業已墊用銀三十八萬有奇此時逆
匪竄擾皖楚九江湖口等處防務正在喫緊吉
安之泰和安福饒州之鄱陽浮梁樂平等縣土
匪尙未殲除淨盡應發防堵經費兵勇口糧用
款尤繁庫儲存銀無幾勢將難乎爲繼惟有請

旨
在江西咸豐二三兩年應解雲南貴州銅本兵餉內
借留銀三十五萬兩以資接濟奏入

上諭曰屢次嚴催不准截留何不知緩急置全局於不
顧實堪痛恨汝自抵任以來祇知有一江西款項則
任意截留保奏則太覺冗濫一籌莫展昧良喪心至
於此極朕自愧用汝庸愚大吏不知汝汗流浹背否

二十日
辛酉
向榮奏言據常州道府來稟盤獲奸

匪謝得玉等供稱有十一月初四初六等日勾
結鎮賊撲常之信臣恐逆賊由鎮江西門徑竄
丹陽當飛飭統帶鎮江官兵余萬清等加意防
範一面札飭德安鄧紹良帶兵就近由高淳移
赴常州俾資鎮定旋據余萬清來文查知逆船
數十隻由瓜州駛過鎮江欲撲我軍營盤乘隙
下竄初四日辰刻北門擁出四千餘賊勢極兇

猛直欲撲營南竄余萬清等督領大兵遏其前
衝鏖戰多時該逆不能越過且拒且退余萬清
等乘勢督兵衝殺殲斃逆賊二百餘名生擒七
名奪獲二百斤大礮兩尊該逆潰遁我兵追偏
城圍將附近城下賊踞卡房悉數焚燒查逆匪
自本年三月失踞鍾山以後倚城爲營負隅自
固臣屢謀進攻該逆百般死拒不敢出城一步

鎮城逆匪疊次出撲均被我兵擊敗此次勾結土匪希圖竄常以窺伺蘇浙詭秘奸謀又經識破惟三城究未克復無以仰慰

宵旰現在新鑄六萬斤大銅礮將次搬至礮臺城內聞此信息甚爲驚惶我軍乘此大張聲勢使賊人聞風氣餒一面潛通內應離間解散以孤賊勢奏入

上諭曰余萬清尙知愧奮著激勵進攻迅破鎮江爲要
至江南情形如是鋪張總未克復汝尙有何面目自
誇耶

同日勝保奏言十六日卯刻臣督兵潛進並派
達洪阿等帶健銳火器營兵分路進攻臣與德
勒克色楞督率各營居中調度又令守備馬翰
忠知縣方鴻恩分投督陣不准兵勇退後該逆

於木城內槍礮密排我軍離濠尙遠礮已如雨
臣見各兵勇齊懷憤激死力向前而限於地勢
未能飛越若急於求功損傷必衆不得已傳令
各路暫行撤隊忽見賊營南面擁出馬步賊衆
四五百名我兵一齊追上槍礮環攻立斃賊八
十餘名擒回賊目一名長髮老賊二名臣回營
後訊據賊目供稱十二日撲出賊匪實被我兵

擊殺一千餘名其僞丞相林胤詳面鼻帶受槍
傷逃回靜海城中現係僞丞相李開芳在此拒
守等語均卽正法查各路堵禦之兵西路雖奏
奉

諭旨責成慶祺調度而東南西凌阿善祿前紮營駐兵
之所被賊掘隄放水已成一片巨浸現已移營
南面高阜之處與臣營盤隔絕東路益覺空虛

可慮除派正定官兵二百名西甯河州官兵三百名並天津勇五百名前往靜海東北楊莊畢莊一帶駐守外仍令天津知縣謝子澄趕緊雇夫開鑿水濠阻賊逃竄其靜海東南四十餘里之四檔口地方路通東省最爲扼要恐餘匪擾及山東勢復滋蔓查山東撫臣現在帶兵駐守武定距四檔口僅二百數十里應請

飭令該撫迅速防堵以昭慎重奏入

上命軍機大臣傳諭勝保曰此次進剿雖有斬擒而限於地勢仍未能直入賊壘實深焦灼靜海西南一帶蘊秀帶兵在彼駐紮能否得力朕甚不放心西凌阿善祿等移營高阜去靜海較遠且與該大臣營盤隔絕聲勢未能聯絡深恐有誤事機均著該大臣體察情形酌量布置所請山東巡撫派兵協堵一節現在

東省防堵緊要兵力較單不敷分撥本日已令瑞麟帶領前鋒等營兵一千名前往軍營卽由該大臣節制應於何處堵截卽著酌量調度再瑞昌帶兵一千名現在移營德州並著隨時知照扼要防堵

上又命軍機大臣傳諭巡防王大臣曰著卽日挑選前鋒護軍驍騎技勇各營兵共一千名交瑞麟統帶前赴勝保軍營勿稍遲延

同日

上諭內閣曰侍郎呂賢基素懷忠義大節無虧前因逆匪竄擾舒城捐軀盡節業經降旨追贈尙書銜優加賜卹著再加恩於舒城建立專祠以慰忠魂而光卹典並著賞給銀三千兩由廣儲司發給交伊子呂錦文祗領卽日前赴安徽扶柩回籍治喪用示朕篤念蓋臣有加無已至意

二十一日壬戌舒興阿奏言前因偵知安徽舒城

失守廬州被圍緊急臣亟宜督兵馳往會勦查
官兵行走路徑應由淮甯沈邱八安徽太和縣
境再由潁州取道六安即可進兵相機勦辦臣

隨飭該地方官趕備車馬無如車馬一時未能
齊備現在雇覓商船由淮屬周家口內河順流
而下馬隊沿岸相隨覈計水程四五日可抵潁

州卽於十五六日分起赴皖臣親率三起挨次行走其馬隊卽分隨步隊船隻沿岸並進臣到潁州府或水或陸趕緊馳往與江忠源合力勦除肅清江北萬不敢稍涉遲誤以冀上慰

宸廑至豫省現在情形惟南陽較緩其羅山信陽等州縣與楚皖二省賊匪滋擾之區或壤地交錯或路徑紛歧旣虞逆賊窺伺又慮捻匪勾引臣已

飛咨撫臣英桂督率柏山並分咨徐廣緒一體
移緩就急擇要嚴防以期共保無虞臣現帶兵
赴皖河南兵力較單直境指日廓清可否量添
兵力來豫之處出自

聖裁奏入

上諭曰現在廬郡已經被圍汝若待事事妥當緩緩由
水路進發必致貽誤事機今歲秋勝保自晉省偏賊

至直沿路並無車馬口糧該大臣與兵丁同食野菜
纔將將趕上亦由該大臣素得兵心之故汝由樞臣
外任兼圻歷練有年緩急應曉豈反不如勝保耶朕
甚爲汝愧天下大患胥由因循觀望之所致朕爲天
下主旣失之於前豈復忍不挽之於後朕總以不誤
兵機能知緩急兼能奮勇殺賊者是賴若一無用之
輩雖留之亦無益國法豈能倖逃懷之

欽定勦平粵匪方略卷七十 癸丑年

十一月二十二日

癸亥

琦善陳金綬雷以誠慧成

奏言查瓜州援揚之賊在運河西岸築立土城
數處意欲近逼三汊河與儀徵之賊爲犄角之
勢臣等公商必須注以全力方能制勝臣琦善
遂於初十日親往三汊河與瞿騰龍先期布置
十一日黎明晉康查文經自東面陳家巷帶勇

赴三汊河臣慧成添派弁兵臣雷以誠亦遣張
錫國帶勇協勦瞿騰龍德興阿率帶弁兵會同
河東兵勇由高明寺搭橋過河分三路前進遊
擊安勇等亦由東路溝港鋪板直撲賊營該逆
大股出巢抵死抗拒瞿騰龍督率弁兵奮勇衝
殺擊斃手執大黃旗賊目一名賊始敗退我兵
乘勢追至賊巢燬其所踞窩棚數處殲斃賊匪

及焚溺死者無算是日已刻城內之賊由南門
撲出數千名分路衝突副都統薩炳阿副將松
齡由南路分兩翼襲抄賊始大敗其自南門分
股西趨之賊經參將鞠殿華等分隊迎擊斃賊
百餘名餘匪悉退入城至儀徵之賊雖屢挫其
鋒該匪仍敢由儀徵河之樸樹灣南岸建立土
城數處並過河占踞臨河之隆覺寺等處臣琦

善遂由三汊河繞越二十餘里於十三日五鼓督率瞿騰龍德興阿等潛師前往十四日黎明踰溝直徧樸樹灣北岸賊營賊匪大驚死守不出官兵佯爲撤隊而設伏於高岡之後以待賊果大股出巢來追追深入伏中馬步隊齊出擊之賊隊遂亂官兵乘勢追殺將賊匪盤踞之窩巢燒燬數十處殺斃賊匪七八百名焚溺死者

不計其數臣等伏查瓜州通江之河向分三道
中路一道爲瓜州河分東西兩岸西路一道爲
儀徵河分南北兩岸東路一道爲揚州運河今
賊已踞其二復會合南京鎮江瓜州各路之賊
由兩河分路齊進賊船不下數千隻儀徵北門
復有山路可直達揚城西北以襲我兵後路而
官兵除傷病不滿一萬各路防剿實覺應接不

三
暇當此萬分緊急之際惟有激勵將士竭力堵禦再十五六日三汊河等處賊匪竄擾甚急接仗情形容另行續奏奏入

上命軍機大臣傳諭琦善陳金綬雷以誠慧成曰該大臣等任令逆賊占踞揚城復又將儀徵失陷逆猷猖獗愈甚而我兵日事遷延此次兜截來援之賊雖經疊獲勝仗而內竄之賊未能併力殲除若不急圖攻

克致令儀徵瓜州匪衆合夥救援揚城攻勦更難得手所稱三汊河等處賊匪竄擾甚急續將接仗情形查奏等語該大臣係於十六日發報何以不將現在接仗大概情形附奏實深懸繫此時福濟業已赴皖廬州一帶賊勢緊急該大臣等圍攻揚城頓兵日久坐視江北賊匪蔓延徒以不能兼顧爲辭不知統兵大帥所司何事也

卷之四十一
四
二十三日甲子江忠源奏言查廬郡南臨大江北

枕淮水爲自古形勝最要之區現在金陵揚鎮
三城未復又爲賊匪北出之衝周城七門惟南
門得勝門外向無房屋水西門外房屋尙少餘
俱民房櫛比臣到任卽出示毀拆尙未興工賊
已踵至盤踞各民房內施放槍礮又水西一門
城牆最低而城外坡隴獨高賊紮營其上俯瞰

城中最爲喫重臣卽駐守其處將城牆加高培厚其次大西門民房逼近城根又無濠溝賊到卽在該處開挖地道經隨臣來安之湖南舉人鄒漢勛訓導鄒台卹駐守雇覓夫役從內迎掘惟城垣周圍三十餘里兵不滿三百勇不滿五千且係新集之衆不諳守城規矩雖將臣帶來兵勇數百分布各城而爲數無多究不敷用幸

城內紳民深明大義見臣力疾登陴部署一切
人人感激奮興出丁助守且設局分段送飯送
粥送茶晝夜不絕兵勇無須舉火得以專意守
垛賊於十三日五更用槍礮分攻得勝大東小
東及南北二門暗用雲梯爬大西門月城經鄒
漢勛督率兵勇抵禦斃賊十餘名賊猶抵死不
退業有數十名爬上月城被我兵奮力將其殺

斃奪獲大黃旗一面雲梯六架其餘各門亦各
斃賊十餘名是日合計斃賊一百四五十名十
四日黎明賊乘大霧猛攻北門經張文斌會同
把總尹孝忠外委張得貴督率武生周恩等奮
力抵禦斃賊四五十名尹孝忠腹受礮傷移時
身故張得貴右肩中槍子傷猶力禦不退右手
復受礮傷三指均斷賊來愈猛周恩父子督率

衆勇拌死抵敵賊始敗退同時賊又乘霧分撲小東門經知府陳源亮督率守備程智泉力斃賊二十餘名是日合計斃賊六七十名十五日卯初賊以小股分攻六門以大隊用雲梯攻得勝門經都司楊煥章督率四川弁兵奮力抵禦把總尙得勝帶勇幫同轟擊自卯至辰斃賊百餘名奪獲雲梯五十餘架各門斃賊七八十名

是日合計斃賊二百餘名此連日賊匪攻城我
兵疊獲勝仗之實情也所有傷亡兵民均由臣
隨時分別賞恤其尹孝忠一員應請

旨交部從優議卹惟是守城數日以來雖屢獲勝兵勇
究屬過單軍餉究屬過絀伏乞

恩旨就近迅調援兵多撥軍餉星速救援保全廬郡卽
以遏賊北竄之路臣歷守廣西湖南江西各城

紳民急公好義固不乏人求如廬郡之萬衆一心實所未見良由涵濡

聖澤淪肌浹髓故能有勇知方衆志成城除俟事竣由臣擇尤保奏外應請

旨先行下詔嘉獎以勵衆心抑臣更有請者臣甫經到任賊卽圍城又值萬難措手之時非賞罰嚴明不能整齊衆志如有出力尤著之員可否由臣

隨時保獎其不遵調度之員並由臣隨時正法
伏候

訓示遵行

同日袁甲三奏言臣接撫臣江忠源來咨據稱
逆匪直撲廬郡守城兵單速請赴援臣接閱之
下不勝焦灼江忠源初到廬州一切守禦之具
未必籌辦齊全自應四路赴援以救危城惟臣

所帶兵勇除宿州營兵先已飭令回宿外其餘
分撥各兵如卽全撤則淮南一帶人心驚惶土
匪必肆猖獗若另爲湊集亦恐不成一軍於南
路大局無濟查陝甘督臣舒興阿帶兵三四千
名於十七日自河南陳州起程來皖臣當卽專
函飛催請其星速赴廬約計旬日可到得此生
力軍與江忠源會合必可取勝且音德布玉山

常清等各帶重兵距廬均止百餘里如可赴援
諒已趕到惟逆情旣如此狡猾卽被擊敗難保
不再圖北竄徐宿一帶喫緊非常而臨固尤爲
緊要門戶臣卽日趕赴宿州先行布置並就近
與和春商酌如和春進紮臨淮卽以駐守固鎮
臣現帶之兵並臧紆青等勇統歸和春管帶以
當第一層門戶臣與王夢齡百勝等分駐宿徐

以爲後路援應如和春必須駐徐臣卽酌駐臨
固獨當一面總期聲勢聯絡斷不任該逆長驅
北犯抑臣更有請者鳳潁土匪不少南路風聲
旣緊難保不乘機爲亂且逆匪若由廬郡擊敗
難保不西竄六安擾及鳳潁並由正陽關竄入
豫省非豫爲防備仍恐臨事無所措手應請

旨飭催徐廣縉酌帶兵勇仍進駐蒙亳牽制土匪並爲

各路聲援至舒興阿所帶之兵聞係由太阜前進距正陽關止數十里並請

飭令舒興阿酌留官兵駐守正陽關似於北路防禦較爲周密

袁甲三又奏言接署江南提督和春咨稱臨淮固鎮爲皖北藩籬卽爲徐州門戶防守徐州不能不兼顧前路等語是迎頭堵剿以防北竄與

臣意見相同惟函內有兩江督臣怡良以鎮江軍務緊要奏請該提督一手經理尙未奉有

諭旨臣

查鎮江防勦自係喫重然彼處兵將甚多且距江揚甚近尙可就近調撥現在皖省事急北路並無重臣及曾歷戎行之人臣卽竭力籌辦恐未能確有把握聞和春屢著戰功所論防勦機宜均中窾要實爲北路長城應請

旨飭令和春仍防宿徐洵於北路大局有裨均奏入
上命軍機大臣傳諭江忠源曰廬郡擊賊連日獲勝覽
奏深慰至皖省兵力單弱前已飛諭吳文鎔等酌撥
存楚兵勇交戴文蘭星馳赴援舒興阿所帶官兵四
千九百餘名由陳州水路赴皖本日復嚴催兼程前
進諒不日即可趕到至應如何調遣之處卽著江忠
源會同舒興阿協力籌辦務將圍攻廬郡之賊先行

撲滅則桐舒二城之匪亦必聞風喪膽該郡紳民萬
衆一心洵足爲長城之倚並著該撫隨時激勵以固
其志和春現在徐州已有旨諭令袁甲三會商扼剿
事宜並諭舒興阿所帶之兵酌分和春統帶必可得
力至江西省應撥解銀十萬兩節經嚴催解皖復飭
河南山東兩省無論何款先行籌解數萬兩以應急
需卽著該撫派委妥員分投迎提又廣東省有解交

部庫銀十五萬兩此時如行抵皖境亦准該撫截留
備用

上又命軍機大臣傳諭袁甲三曰廬州被圍緊急賊匪
大隊盤踞城外音德布現在六安玉山現在東關常
清現在和州所帶之兵是否抵郡江忠源摺內均未
聲敘昨已諭和春由徐州前進想亦卽日起程該給
事中與和春旣已熟商所慮宿徐臨淮緊要之處卽

著妥爲布置不可疏虞本日復有旨飛催舒興阿兼程赴援並令將所帶之兵酌量分給和春統帶況由徐州前進本係迎頭剿殺既可力解城圍並可杜賊北竄於剿賊情形更爲得勢

上又命軍機大臣傳諭舒興阿曰舒興阿前奏分帶馬步官兵於十五六日起程赴皖計已早過潁州此項官兵幾及五千名水陸並進聲勢甚壯著卽酌撥數

百名派委得力將弁帶往正陽關扼守如今該逆過關一步卽將扼守該處之領兵鎮將以軍法從事該督仍親督官兵兼程前進速援廬州不得再事遷延和春現在徐州已有旨令其赴援廬州該督所帶之兵卽可分撥交其統帶和春熟悉賊情屢經戰陣必可得力郝光甲屢次逗留規避甚不足恃該督若將兵丁全行交其管帶恐有貽誤著隨時查察如仍畏

挫兇鋒士皆用命洵屬忠勇可嘉並據江忠源奏廬
郡紳民萬衆一心同仇敵愾爲各省所未見尤堪嘉
尙著該撫先行傳旨褒獎事竣據實保奏朕必破格
施恩湖北外委張得貫肩受槍傷礮斷三指猶能力
戰殺賊武生周恩父子帶勇拌死禦賊均屬奮勇出
衆所有在事文武有能似此出力尤著者卽著隨時
保奏其有不遵調度畏葸貽誤者卽著隨時正法總

期信賞必罰以振軍威所有湖北把總尹孝忠防守北門中礮陣亡實堪憫惻著交部從優議卹

二十四日 乙丑 福濟奏言 臣於十三日接奉

諭旨令馳赴安徽廬州會同江忠源督辦防勦當於十六日趕緊帶兵起程繼思儀徵甫經失守揚城正在喫緊今忽撤兵數百名誠恐顧彼失此有誤事機當將河漕兩標兵五百八十名仍留灣

頭交慧成調遣臣僅帶山東鄉勇一百五十名
前往惟皖省不靖剿滅必藉兵威查寶應縣平
橋有參將嵩齡帶領山東兵四百名防守雖係
揚州後路而賊烽遠隔數百里斷無意外之虞
以之調赴安徽似可轉無用爲有用更益以淮
安城守營兵二百名臣共帶兵六百名稍壯聲
威可資進剿

同日雷以誠慧成奏言十三日夜賊匪以船爲橋分過東岸桂花莊地紮營經胥康查文經帶兵於十四十六等日兩次擊殺賊匪千餘名賊匪在桂花莊一帶晝夜放火爲號城內逆賊探有救應連日由徐凝鈔關等門出城衝突我兵晝夜換班鏖戰殺死賊匪無數詎賊匪前面併力接戰實則暗由城頭運下木植排成木寨

架礮向我營攻擊礮子如雨勢甚猖獗經晉康
查文經等親督參將師長鑣首先領隊由中路
搶入木寨衛守備李金鰲等帶隊由西路搶入
參將蘇勒芳阿等帶隊由東路搶入將木寨內
賊匪擊殺殆盡奪獲滾木數百件旗幟槍械數
百件生擒賊匪二十餘名此次賊匪亟思衝出
與瓜州賊匪會合幸蒙

諭旨豫示機宜兵勇用命能將賊築木寨立刻搶奪足
以張軍威而褫賊膽均奏入報

聞

二十五日丙寅瑞昌奏言臣於十三日接山東巡

撫張亮基來咨以逆匪久踞靜海德州兵勇單
弱不足以資防禦請

飭臣統兵前往德州迤北堵剿臣卽飭令頭起官兵於

十九日起程其餘各起官兵亦陸續前進斷不敢稍有遲緩致誤事機奏入

上諭曰到防後知照勝保聽該大臣派撥何路防剿卽遵令行

同日楊以增奏言清江爲南北咽喉水陸程途四通八達設防本屬不易且局勇礮勇合計見多分布卽少其外調客兵祇有山東七百餘名

山西三百餘名除派往蔣壩三百名平橋四百
名外計存浦僅山西兵三百餘名萬一揚賊潰
圍北竄兵勇甚單難資守禦臣與前漕臣李湘
棻密計熟籌惟有在寶應高郵一帶扼要嚴防
較之平橋尤爲得力李湘棻卽日督帶參將嵩
瑞兵四百名並自練礮勇進駐寶應高郵一帶
相機堵剿以防北竄奏入報

聞

二十六日

丁卯

勝保奏言

臣接慶祺密函獨流西

北有水之處近日冰凍將堅賊營防範稍疏易
於攻撲臣以進攻地勢非親往相度不可遂帶
小隊百人坐冰牀前赴西北面積水處所詳視
地勢折回慶祺營中面商機宜繞至第六鋪地
方忽聞東南連環槍礮知係我兵開仗南岸料

有德勒克色楞並達洪阿督陣必可抵禦惟北岸兵力稍單恐賊由此而出馳馬先赴北岸我兵果被大股賊匪圍繞臣卽督小隊百餘人用連環槍礮緊跟轟擊先斃執旗賊目四五人又擊倒長髮賊三四十名賊勢潰退臣正在催兵淹殺遙望南岸我兵已早開仗且聞神威礮連環攻擊見黃旗紛倒賊屍填積料獲大勝正可

乘勢兩岸夾擊嗣因南岸撤隊太速該逆用噴筒火彈復行撲出我兵自相擾亂恐有疏失而爲河所阻又無船隻未能飛越萬分憤急幸北岸逆衆已奔回土壘臣卽由浮橋渡南岸大營維時賊匪已退入木城詳查我兵何故退回據各營將士面稟是日午刻忽見賊壘擁出二三千人分三路撲來我兵奮力迎擊斃賊無數申

刻逆衆傾巢盡出我兵亦分投掩殺賊順南隄而逃副都統佟鑑用礮橫擊黃旗紛倒隄面賊屍填積約斃四五百名逆衆未能入壘其勢已慌南北兩面又有知府朱鎮知縣謝子澄帶勇追殺該逆沿隄上下狂奔窘蹙萬狀佟鑑見賊勢大潰飛馬親赴濠邊欲拽賊營搭濠板片斷賊歸路隨行兵丁不過二三百名該逆拌死從

佟鑑背後衝去將我兵分爲兩截佟鑑到岸卽
飭兵丁併力拽取板片不意爲冰所膠急不能
拔親自下馬督拽足滑而踣賊衆擁來刺朱
鎮謝子澄遙見佟鑑被困危急不及督勇策馬
赴前救護謝子澄卽與佟鑑同時陣亡朱鎮亦
受槍傷幸大隊官兵繼至賊衆奪橋奔回僅將
朱鎮扶救回營而護礮官兵及拉礮丁夫被衝

失散達洪阿所督北路健銳火器兩營官兵離
壘北最近收隊時先行退下全隊兵勇亦遂掣
動逆匪復從壘中悉數撲出德勒克色楞急督
吉林馬隊蒙古各兵極力抵禦又經臣從河北
督放槍礮始將賊匪擊回而健銳火器兩營兵
丁仍復奔回不能列隊以致二品大員失援陣
亡四百斤神威礮八尊遺失一半臣甫離營半

日未經臨陣指揮大捷之餘遇此失挫達洪阿
久歷戎行所帶皆京旗勁旅隨臣打仗已非一
次於一切調度機宜諒能略曉乃始以貪功銳
進繼以輕退失機致該逆萬分窮蹙之餘又張
兇燄除將首先退回之官兵令達洪阿查明一
律正法外達洪阿銳進輕退調度乖方應請

旨先行摘去頂戴仍交部嚴加議處責令帶兵自效臣

勝保臣德勒克色楞有統帶幫辦之責咎俱難
辭應一併仰懇

飭部嚴議

勝保又奏言副都統佟鑑自管帶礮位到營每
次隨臣進攻謹受調度奮往向前不意此次臣
因赴西河履勘情形未能親臨督陣逆賊撲出
該副都統連環施放槍礮已轟斃賊匪數百名

因見賊勢大潰親至濠邊拽取濠板斷賊歸路
竟爲逆匪擁圍身受重傷陣亡忠勇血誠深堪
憫惻查該員上有老母八十餘歲下無子嗣仰
懇

天恩飭部從優議卹並飭該旗查明近支有無可以承
嗣之人具奏以慰忠魂又知府用天津縣知縣
謝子澄前次禦賊保衛津城自調赴軍營帶勇

集賢堂卷之二
殺賊無不勇往爭先今見佟鑑失陷策馬赴援
身受七傷捐軀致命倍深痛惜應一併請

旨飭部從優議卹候選知府朱鎮亦因佟鑑危急單騎
馳救以致脖受槍傷甚重至今槍子未出查該
員以文員帶勇屢次奮勇打仗今又不避危險
身受重傷實屬勇往出力爲軍營中不可多得
之員可否懇

恩以道員歸部選用並

賞戴花翎之處出自

聖裁奏入

上命軍機大臣傳諭勝保曰該大臣統領全軍於諸將
進退機宜不能先期調度以致損折賢員實堪痛惜
計攻剿獨流靜海而月以來日盼殄除該逆以定畿
輔不料有此敗衄轉令逆燄猖獗殊失朕望朕因將

才難得姑予薄譴勝保等若不將此股逆匪全行撲滅何足以贖愆尤所有德勒克色楞原帶之東三盟兵丁已諭知僧格林沁速撥數百名飭赴勝保大營交該貝子統帶以資攻擊該大臣卽熟籌布置西北面積水處所如果冰凌堅實可以設法進攻不得坐失機宜天津練勇素稱矯捷謝子澄旣經陣亡恐該勇無人統束或致四散該大臣卽傳諭鹽政文謙迅

赴軍營將謝子澄前帶各勇收集統帶該鹽政係特派天津防勦大員素得該處士民之心該大臣務當推誠相與藉資臂助達洪阿係棄瑕錄用之員此次大損軍威實堪痛恨已有旨將該員革職家產查封仍令帶罪自效若再不遵調度失機貽誤國法豈容倖逃並著該大臣傳知各營以後進剿事宜無論何員貽誤卽以軍法從事

上諭內閣曰此次南岸失利雖因達洪阿銳進輕退以致挫衄勝保身爲統帥各營皆歸節制何以離營半日卽至將士不遵調度輕率進兵平日所稱號令嚴明者何在德勒克色楞係幫辦大員不能督率約束咎亦難辭勝保德勒克色楞均著各降四級留任拔去花翎以示薄懲達洪阿與賊接仗已非一次豈不能深悉賊情乃始以貪功銳進繼以輕退失機尤堪

痛恨著卽行革職仍交勝保責令帶罪自效如再不
知奮勉卽於軍前正法該革員家產並著查封候旨
辦理鑲黃旗蒙古副都統佟鑑管帶礮位疊著戰功
此次接仗業已轟斃賊匪數百名乃因拽取濠板被
賊擁圍猶復手執長矛連刺數賊身受重傷登時遇
害忠勇血誠覽奏不禁隕涕佟鑑著加恩追贈將軍
卽照將軍陣亡例賜卹入祀昭忠祠並賞給二等輕

車都尉世職仍准其入城治喪任內一切處分悉予
開復應得卹典該衙門察例具奏該員現無子嗣著
該旗於本族近支內擇其應繼之人卽爲立嗣承襲
世職知府用天津縣知縣謝子澄督帶練勇保衛天
津民心愛戴自調赴軍營帶勇殺賊極爲奮勇乃以
救援佟鑑身受七傷被害情形尤堪痛惜謝子澄著
加恩賞給布政使銜卽照布政使陣亡例賜卹於四

川原籍建立專祠並賞給騎都尉世職佟鑑謝子澄
仍著於陣亡地方建祠置祀以慰忠魂至候選知府
朱鎮不避危險單騎赴援以致身受槍傷實屬勇往
出力著加恩以道員歸部選用並賞戴花翎以示優
獎

同日崇綸奏言現在賊船由黃州府竄往樊口
分股又赴華容新店各村鎮四出焚掠臣屢勸

督臣派兵攻剿督臣之意必待湖南兩廣並自
造各船礮到齊方可出師若以數千之旅惟恐
有失萬不肯行終日閉城坐守一籌莫展查省
中現有兵勇一萬數千名除守城及紮營附城
要隘外尙有數千可以出征若待湖南兩廣各
船礮到齊道路迢遙深恐有需時日況賊匪大
股多赴安徽現在楚境者俱係零星小醜並有

土匪冒名搶劫長髮老賊實係無多若派數千官兵配以現有礮船水陸夾擊足資痛剿且聞賊匪現在田鎮築壘若果日久盤踞則商賈不通驛路梗塞爲患滋深臣思荊州將軍台湧兼署提篆統轄滿漢官兵現賊在下游荆襄安謐當已函致該將軍仍帶前調滿兵二千名來省會商如肯帶領前來先就現成礮船水陸並征

否則臣卽前去或兩人同往與其株守一方莫如殺賊救民最爲目前要著臣日夜籌思萬分焦灼以致病勢較重仰懇

天恩暫准賞假調理奏入

上命軍機大臣傳諭吳文鎔崇綸曰前據台湧奏稱先後接據吳文鎔崇綸函咨一則令其帶兵赴省一則令其不必來省是該督撫各執一詞意見已屬兩歧

茲據崇綸奏力籌勦賊並吳文鎔閉城坐守等語朕
以吳文鎔老成練達現當楚北逆氛未靖一切籌防
籌勦堪資倚任詎可株守省垣不圖前進崇綸與吳
文鎔辦事一方應如何協力同心迅圖攻勦遇事齟
齬先已不能和衷又安望其於事有濟儻因各懷已
見致誤事機該督撫等厥罪維均朕斷不能爲之曲
宥該逆於田鎮築壘黃州一帶賊亦不少臬司唐樹

義曾否遵旨前往設法兜剿著吳文鎔一面嚴飭該
臬司迅圖剿洗一面親督官軍出省督戰並察看何
路緊要卽馳往何路截剿所有省城防守事宜卽責
成崇綸妥籌布置儻有疏虞亦必重治其罪決不寬
貸台湧官兵應否飭令帶赴下游會合追擊並著該
督撫會商兼顧不得各執己見崇綸因病請假著卽
賞假十日調理一切防剿要務仍當盡心籌畫毋稍

議卸

二十八日己巳和春奏言查逆匪直撲廬州情形

危急宿徐爲南北咽喉最關緊要而臨淮近接廬郡堵禦尤爲喫緊現在袁甲三帶領兵勇移紮宿州防守甚嚴惟該逆以大股攻撲廬郡若分股由巢縣和州竄突或儀徵之賊由天長盱眙北趨均可直抵臨淮必須嚴堵該處方可遏

賊北竄臣已將徐州防堵事宜移交鎮臣百勝
徐州道王夢齡接辦卽帶熱河駐防兵並臧紆
青練勇共一千餘名於二十五日起程馳赴宿
州會商袁甲三先將臨淮防堵妥爲布置卽趕
至廬州會同舒興阿江忠源合力攻剿以保危
城惟現在所帶兵勇未經戰陣恐攻剿未能應
手臣原帶湖南三四五起官兵七百餘名現在

聞

鎮江向來打仗勇敢已忝向榮將此起官兵派
已革副將鄭魁士管帶前來以資得力奏入報
同日

上命軍機大臣傳諭勝保曰朕思逆匪渡河北竄勝保
督兵追勦屢著戰功懷慶解圍之後特授爲欽差大
臣各路官兵均歸節制朕待勝保恩意不爲不厚倚

昇不爲不專該大臣中夜捫心亦當知感知懼乃自
逆匪占踞獨流靜海後屢閱奏報詞氣矜張漸有自
滿之意前此我兵誤陷冰坑致多損折此次接仗竟
至大員陣亡遺失礮位該大臣身爲統帥離營之時
何竟毫無布置及至失事轉以離營他往諉過於人
又何以折服將士之心爲大將者必當虛心集益謀
出萬全使將士人人用命感奮圖功若師心自用不

聽人言以致衆心渙散不肯出力或偏聽幕客傳述之言或濫開委員逢迎之路致有貽誤其患何可勝言勝保經此次訓諭後若能返躬省過與諸將士合力同心剋期勦逆不但盡贖前愆仍可渥膺懋賞儻遷延日久糜帑無功是勝保不能承受朕恩國法豈能寬宥德勒克色楞係幫辦大員與勝保共辦一事責無旁貸汝二人尤當知無不言和衷共濟達洪阿

究係勇將此次加以薄懲正望其奮勉立功再邀恩
眷朕賞功罰罪一秉至公惟視汝等自取何如耳懍
之慎之

二十九日

庚午

僧格林沁奏言近聞獨流一帶有

薙髮潛出者深恐該逆溷出探聽消息以便擇
路豕突復探得逆匪各做麪餅用小袋裝盛其
爲趕辦裹糧急思他竄無疑臣當派員前往慶

祺軍營令其轉傳各營一體嚴加防範至前敵
進仗情形我兵雖連日出隊無如該逆詭譎異
常我兵往攻先必堅守窺我軍心懈慢伺隙方
出臣思該逆恃險固守以逸待勞我兵如此進
攻似難得力現已密致勝保步步爲營先將營
盤逼近再將天津海口七千斤至萬斤大礮運
至營中此礮力能致遠若高築礮臺向內攻擊

或可傾覆賊巢二十三日我兵失利失去礮位
軍械無算臣聞信之下憤懣難名且謝子澄爲
津郡循吏深洽輿情所帶義勇頗資得力今猝
然陣亡設人心渙散郡城可慮之至二十六日
據奕紀報天津義勇因謝子澄陣亡幾至生變
臣當卽發去告示剴切安撫茲又據慶祺委員
稟報該縣南里坦地方有青縣土匪結夥搶掠

若不消患將萌深恐與該逆勾結亦經飛咨直隸督臣迅委幹員前往擒捕並嚴札該縣實力查拏以靖地方奏入

上命軍機大臣傳諭僧格林沁曰二十三日我兵進仗失利銳氣少挫疊經降旨嚴飭勝保督率將士併力攻剿以贖前愆現在該逆有裹糧思竄情形該大臣駐紮王慶坨地方足可堵禦北面惟由獨流至東安

一路亦應派兵扼其要衝不可稍涉大意至青縣土匪在南里坦地方乘機竊發難保不與該逆勾結該大臣現已知會桂良趕緊派委幹員迅速捕拏仍著於附近大營處所嚴密巡緝毋致延蔓

同日勝保奏言二十七日卯刻臣親督各營將弁一齊出隊商令德勒克色楞帶蒙古馬隊分列陣後以備接應抄襲復恐該逆由靜海抄來

豫傳黑龍江總管魁福密授機宜並將托雲保
所帶吉林官兵及健銳營馬隊一併帶往令其
於葡萄窪一帶設伏以待又傳令駐守羅古莊
步隊官兵抄殺接應一面催調大礮出隊臣卽
乘馬親督前進行距獨流二里許遙見北岸逆
匪出至下圈村一帶排列馬步隊約有六七百
名臣卽督天津固原官兵逼近河岸開放連環

槍礮擊死該逆大半餘皆帶傷狼狽竄回臣復
令開放連環大礮將其木城屋宇擊破十數處
其靜海撲來馬賊三四百名甫至葡萄窪經魁
福帶領馬隊陡然壓下該逆猝不及防經我兵
擊斃一百餘名追趕入水者三四十名維時天
色漸晚臣慮將士貪功深入卽令撤隊徐退勿
蹈前轍奏入報

聞